



**NOGOMETNI/FUDBALSKI SAVEZ
BOSNE I HERCEGOVINE**

**P R A V I L N I K
o nogometnim/fudbalskim zastupnicima NS/FS BiH**

Sarajevo, septembar/rujan 2023. godine

Na osnovu člana 35. Statuta Nogometnog/Fudbalskog saveza Bosne i Hercegovine i FIFA Pravilnika o nogometnim/fudbalskim zastupnicima od 16.12.2022. godine, Izvršni odbor Nogometnog/Fudbalskog saveza Bosne i Hercegovine, na sjednici održanoj dana 29.09.2023. godine godine d o n o s i

P R A V I L N I K
o nogometnim/fudbalskim zastupnicima NS/FS BiH

I - OPŠTE ODREDBE

Član 1.
(Definicije)

(1) U cilju primjene ovog Pravilnika primjenjivat će se odredbe Statuta FIFA-e, Statuta Nogometnog/fudbalskog saveza BiH, FIFA Pravilnika o statusu i transferima igrača i Pravilnika o registracijama klubova i igrača i statusu i transferu igrača Nogometnog/fudbalskog saveza BiH, a pojmovi korišteni u ovom Pravilniku imaju sljedeće značenje:

- a) **Agencija:** organizacija, društvo, kompanija koja zadržava, uključuje, zapošljava ili na drugi način djeluje kao sredstvo za poslovne aktivnosti jednog ili više nogometnih/fudbalskih zastupnika.
- b) **Drugostepeni organi:** nadležne komisije za status i transfere igrača entitetskih saveza ili Komitet za status igrača i transfere NS/FS BiH.
- c) **Interes:** (1) svako stvarno vlasništvo pravne osobe preko koje se provode relevantne aktivnosti tih subjekata, osim običnog i slobodno dostupnog neprenosivog ličnog članstva koje vlasniku daje pravo na jedan glas u klubu; i/ili (2) obavljanje pozicije koja može omogućiti materijalni, finansijski, komercijalni, administrativni, upravljački ili bilo koji drugi utjecaj na poslove fizičke ili pravne osobe, direktno ili indirektno, formalno ili neformalno.
- d) **Klijent:** savez, klub, igrač ili trener, koji mogu angažovati nogometnog/fudbalskog zastupnika za pružanje njegovih usluga.
- e) **Naknada:** bruto finansijska naknada za angažman utvrđena ugovorom, koja uključuje osnovnu naknadu, sve naknade za prijavu i sve iznose koji se plaćaju ako su ispunjeni određeni uslovi (na primjer, bonus za vjernost ili učinak).
U cilju izbjegavanja sumnje, sve ugovorene naknade za budući transfer i sve neplaće beneficije, kao što je osiguranje vozila, smještaja ili telefonskih usluga, ne uzimaju se u obzir pri izračunu bruto novčane naknade.
- f) **Nogometni/fudbalski zastupnik:** fizička osoba s licencom FIFA-e za pružanje usluga nogometnog/fudbalskog zastupnika.
- g) **Određena transakcija:** transakcija u kojoj su sve uključene strane definisane i identifikovane.
- h) **Ostale usluge:** sve usluge koje nogometni/fudbalski zastupnik obavlja za ili u ime nekog drugog klijenta osim usluga nogometnog/fudbalskog zastupnika, uključujući ali ne ograničavajući se na pružanje pravnih savjeta, finansijskog planiranja, savjetovanje, upravljanje pravima i pregovaranje o ugovorima o

reklamiranju.

- i) **Platforma:** digitalna platforma kojom upravlja FIFA putem koje se odvija kompletan proces licenciranja nogometnih/fudbalskih zastupnika, postupci rješavanja sporova pred nadležnim organima FIFA-e, kontinuirani profesionalni razvoj i izvještavanje, dostupna na sljedećoj web stranici: <https://agents.fifa.com/>.
- j) **Pojedinac:** igrač ili trener.
- k) **Povezani nogometni/fudbalski zastupnik:** nogometni/fudbalski zastupnik povezan je sa drugim nogometnim/fudbalskim zastupnikom na način: (1) da su zaposleni ili ugovorom angažovani u istoj agenciji putem koje se pružaju usluge nogometnog/fudbalskog zastupanja; (2) oboje su direktori, dioničari ili suvlasnici iste agencije preko koje se pružaju usluge nogometnog/fudbalskog zastupanja; (3) da su ili bračni partneri ili su članovi istog domaćinstva, braća i sestre, roditelji i djeca ili pastorki; ili (4) zaključili su ugovore ili drugu vrstu dogovora, bilo da će formalno ili neformalno sarađivati, više od jednog puta, u pružanju bilo koje usluge ili da će dijeliti prihode/dobit od bilo koje pružene usluge nogometnog/fudbalskog zastupanja.
- l) **PP FIFA:** FIFA Pravilnik o radu s posrednicima.
- m) **PP NS/FS BiH:** Pravilnik o posrednicima NS/FS BiH.
- n) **Pravilnik:** ovaj Pravilnik sa svim izmjenama i dopunama.
- o) **Pristup:** (1) bilo koji fizički, lični kontakt ili kontakt putem bilo kojeg sredstva elektroničke komunikacije sa klijentom; (2) svaki direktni ili indirektni kontakt sa drugom osobom ili organizacijom povezanom sa klijentom kao što je član porodice ili prijatelj ili (3) bilo koje radnje kada nogometni/fudbalski zastupnik koristi ili upućuje drugu osobu ili organizaciju da kontaktira klijenta u njegovo ime na način opisan u tačkama (1) i (2).
- p) **Prvostepeni organi:** Nadležne Komisije za status i transfere igrača opštinskih/područnih/kantonalnih/županijskih nogometnih/fudbalskih saveza.
- q) **RSTP:** FIFA Pravilnik o statusu i transferu igrača, sa izmjenama i dopunama.
- r) **Savez:** NS/FS BiH.
- s) **Subjekt koji angažuje:** klub ili savez koji može angažovati igrača ili trenera.
- t) **Subjekt koji se napušta:** klub ili savez iz kojeg igrač ili trener odlazi da bi se zaposlio i/ili registrovao u subjektu koji angažuje.
- u) **Transakcija:** (1) zapošljavanje, registracija ili deregistracija igrača za klub, (2) zapošljavanje ili angažovanje trenera u klub ili savez, (3) prijenos registracije igrača iz jednog kluba u drugi, (4) stvaranje, prekid ili izmjena uslova zaposlenja pojedinca.
- v) **Ugovor o zastupanju:** pismeni ugovor koji se zaključuje u svrhu uspostavljanja pravnog odnosa za pružanje usluga nogometnog/fudbalskog zastupnika.
- w) **Usluge nogometnog/fudbalskog zastupnika:** usluge vezane za nogomet/fudbal koje se pružaju za ili u ime klijenta uključujući bilo kakve

pregovore ili komunikaciju koja se odnosi na predmetne usluge ili pripreme za iste ili druge povezane aktivnosti sa svrhom, ciljem i/ili namjerom zaključivanja transakcije, a koja uključuje i probe.

(2) Izrazi koji se odnose na fizičke osobe, odnose se podjednako i bez diskriminacije na oba spola.

(3) Svaki izraz u jednini vrijedi za množinu i obrnuto.

Član 2. **(Predmet i ciljevi Pravilnika)**

(1) Ovim Pravilnikom se na jedinstven način regulišu pitanja u vezi obavljanja aktivnosti nogometnih/fudbalskih zastupnika u Bosni i Hercegovini i primjenjuje se na sve ugovore o zastupanju na domaćem nivou tj. na teritoriji Bosne i Hercegovine ili na bilo koje radnje i postupanja povezana s domaćim transferima ili transakcijama.

(2) Odredbe ovog Pravilnika primjenjuju se na sve ugovore o zastupanju u sljedećim situacijama:

- a) Kada se reguliše pružanje usluge nogometnog/fudbalskog zastupnika u određenoj transakciji vezanoj za domaći transfer koji se realizuje na teritoriji Saveza i u njegovoj nadležnosti (ili prelazak trenera između dva kluba koja su pridružena Savezu ili između kluba pridruženog Savezu i reprezentativne selekcije Saveza) ili
- b) Kada se reguliše pružanje usluge nogometnog/fudbalskog zastupnika koja se odnosi na više od jedne određene transakcije, od kojih je jedna vezana za domaći transfer u nadležnosti Saveza (ili transfer trenera između dva kluba pridružena Savezu ili između kluba pridruženog Savezu i reprezentativne selekcije Saveza).

(3) Ovaj Pravilnik se primjenjuje na ugovore o zastupanju kojima se uređuje pružanje usluga nogometnog/fudbalskog zastupnika koji nisu povezani sa određenim transakcijama u vezi sa međunarodnim transferom i kada je klijent registrovan ili ima prebivalište/sjedište na teritoriji u nadležnosti Saveza u trenutku kada je taj ugovor o zastupanju potpisan.

(4) Ovim Pravilnikom se osigurava da je ponašanje nogometnog/fudbalskog zastupnika usklađeno sa sljedećim ciljevima utvrđenim od strane FIFA-e:

- a) Podizanje i postavljanje minimalnih profesionalnih i etičkih standarda za bavljenje poslom nogometnog/fudbalskog zastupnika,
- b) Osiguravanje kvalitete usluge koju nogometni/fudbalski zastupnici pružaju klijentima uz poštene, razumne i ujednačene naknade za usluge,
- c) Ograničavanje sukoba interesa radi zaštite klijenata od neetičkog ponašanja,
- d) Poboljšanje finansijske i administrativne transparentnosti,
- e) Zaštita igrača koji nemaju iskustva ili informacija koji se odnose na sistem nogometnih/fudbalskih transfera,
- f) Zaštita ugovorne stabilnosti između igrača, trenera i klubova,
- g) Podsticanje obuke i razvoja mladih igrača,
- h) Promovisanje duha solidarnosti između elitnog i bazičnog nogometa/fudbala,
- i) Zaštita maloljetnika,
- j) Održavanje konkurentne ravnoteže,
- k) Osiguravanje regularnosti sportskih takmičenja i
- l) Sprječavanje zlopotrebe, pretjerane i spekulativne prakse.

Član 3. **(Licenciranje nogometnih/fudbalskih zastupnika)**

(1) Fizička osoba može postati nogometni/fudbalski zastupnik u skladu sa procedurom utvrđenom odredbama FIFA Pravilnika o nogometnim/fudbalskim zastupnicima.

(2) Osoba koja je ranije licencirana i koja je stekla zvanje nogometnog/fudbalskog zastupnika u skladu sa FIFA Pravilnikom o posrednicima, izuzeta je od obaveze polaganja ispita utvrđenog FIFA Pravilnikom o nogometnim/fudbalskim zastupnicima, ukoliko ispunjavanja i uslove utvrđene članom 23. FIFA Pravilnika o nogometnim/fudbalskim zastupnicima.

(3) Osoba koja nije ranije licencirana i koja nije stekla zvanje nogometnog/fudbalskog zastupnika u skladu sa FIFA Pravilnikom o radu s posrednicima ili je ranije licencirana ali ne ispunjava sve uslove po članu 23. FIFA Pravilnika o nogometnim/fudbalskim zastupnicima, može, isključivo putem Platforme, podnijeti aplikaciju za sticanje zvanja nogometnog/fudbalskog zastupnika, uz koju je potrebno da ispuni zahtjeve podobnosti, položi ispit za nogometnog/fudbalskog zastupnika koji se provodi isključivo od strane FIFA-e na jednom od tri jezika (engleski, španski ili francuski) posredstvom nekog od saveza članica FIFA-e te uplati FIFA-i godišnju naknadu za licencu.

(4) Licenca koju je izdala FIFA omogućava nogometnom/fudbalskom zastupniku pružanje njegovih usluga na teritoriji Saveza.

(5) Nogometni/fudbalski zastupnik koji pruža usluge na teritoriji Saveza podliježe odredbama ovog Pravilnika i svim propisima Saveza primjenjivim na nogometne/fudbalske zastupnike.

(6) U vezi sa stavom (3) ovog člana, osoba se može prijaviti za polaganje ispita za sticanje zvanja nogometnog/fudbalskog zastupnika, kojeg isključivo putem Platforme provodi FIFA, uz administrativnu podršku Saveza i u administrativnom sjedištu Saveza, uz uplatu naknade za pokrivanje administrativnih troškova polaganja FIFA ispita za nogometne/fudbalske zastupnike i predočavanje dokaza o uplati iste najkasnije na dan polaganja ispita, a čiju visinu u skladu sa uslovima i brojem prijavljenih kandidata, u svakom konkretnom slučaju, određuje Generalni sekretar Saveza posebnom odlukom.

Član 4. **(Usklađenost sa zahtjevima podobnosti)**

(1) Savez će prijaviti FIFA-i sve pritužbe ili sumnje u vezi sa nepodobnosti bilo kojeg nogometnog/fudbalskog zastupnika ili podnosioca zahtjeva za sticanje zvanja nogometnog/fudbalskog zastupnika sa zahtjevima podobnosti iz člana 5. FIFA Pravilnika o nogometnim/fudbalskim zastupnicima.

(2) Savez će pružiti pomoć FIFA-i u istraživanju i utvrđivanju postojanja bilo kakvog potencijalnog nepoštivanja zahtjeva podobnosti utvrđenih članom 5. FIFA Pravilnika o nogometnim/fudbalskim zastupnicima tako što će pružati sve relevantne informacije koje ima na raspolaganju ili koje je FIFA zatražila.

II – RAD NOGOMETNIH/FUDBALSKIH ZASTUPNIKA

Član 5. (Opšte odredbe)

(1) Samo nogometni/fudbalski zastupnik licenciran od strane FIFA-e može pružati usluge nogometnog/fudbalskog zastupanja kako u domaćim, tako i u međunarodnim transakcijama.

(2) Nogometni/fudbalski zastupnik mora u svakom trenutku zadovoljavati zahtjeve podobnosti iz člana 5. FIFA Pravilnika o nogometnim/fudbalskim zastupnicima.

(3) Nogometni/fudbalski zastupnik može obavljati svoje poslove i pružati svoje usluge putem agencije. Zaposlenici ili druga lica koja su angažovana u agenciji, a koja nisu nogometni/fudbalski zastupnici, ne smiju pružati usluge nogometnog/fudbalskog zastupnika niti smiju imati bilo kakav pristup potencijalnom klijentu radi zaključivanja sporazuma o zastupanju. Nogometni/fudbalski zastupnik je u potpunosti odgovoran za rad svoje agencije, njenih zaposlenika ili drugih predstavnika u slučaju kršenja ovog Pravilnika.

(4) Fizičke ili pravne osobe koje ne smiju imati interes u bilo kakvim poslovima koje obavljaju nogometni/fudbalski zastupnici ili njihove agencije su:

- a) Klijenti,
- b) Osoba koja ne ispunjava uslove da postane nogometni/fudbalski zastupnik prema članu 5. FIFA Pravilnika o nogometnim/fudbalskim zastupnicima,
- c) Bilo koje fizičko ili pravno lice koje ima bilo koja direktna ili indirektna prava vezana za registraciju igrača, a kojima se krši član 18 bis ili član 18 ter RSTP, odnosno, relevantne odredbe Pravilnika o registracijama klubova i igrača i statusu i transferu igrača NS/FS BiH.

Član 6. (Zastupanje klijenta)

(1) Nogometni/fudbalski zastupnik može pružati usluge nogometnog/fudbalskog zastupnika za klijenta tek nakon što sa njim zaključi ugovor o zastupanju.

(2) Samo licencirani nogometni/fudbalski zastupnik može pristupiti potencijalnom klijentu i/ili zaključiti sa klijentom ugovor o zastupanju za pružanje usluga nogometnog/fudbalskog zastupnika.

(3) Ugovor o zastupanju zaključen između fizičkog lica i nogometnog/fudbalskog zastupnika ne može trajati duže od dvije godine. Ovaj se rok može produžiti isključivo novim ugovorom o zastupanju. Bilo koja ugovorna odredba koja omogućava automatsko produženje ugovora o zastupanju ili bilo koja druga odredba koja ima za cilj produženje trajanja bilo koje odredbe ugovora o zastupanju izvan prednje navedenog maksimalnog perioda trajanja, bit će ništava.

(4) Nogometni/fudbalski zastupnik može zaključiti samo jedan ugovor o zastupanju sa istim pojedincem za isti vremenski period. Prije zaključenja ugovora o zastupanju s pojedincem ili prije izmjene postojećeg ugovora o zastupanju sa pojedincem, nogometni/fudbalski zastupnik će:

- a) Pismeno obavijestiti pojedinca da bi trebao razmotriti mogućnost traženja nezavisnog pravnog savjeta u vezi sa ugovorom o zastupanju i

b) Pribaviti pisanu potvrdu pojedinca da je ili dobio savjet ili odlučio da neće tražiti takav nezavisni pravni savjet.

(5) Ugovor o zastupanju zaključen između subjekta koji angažuje ili subjekta koji se napušta i nogometnog/fudbalskog zastupnika, ne podliježe ograničenju maksimalnog trajanja ugovora o zastupanju.

(6) Nogometni/fudbalski zastupnik može u svakom trenutku zaključiti i izvršavati više ugovora o zastupanju (koji se odnose na različite transakcije) sa istim subjektom koji angažuje ili sa istim subjektom koji se napušta, a u skladu sa odredbama tih ugovora.

Član 7. (Ugovor o zastupanju)

(1) Ugovor o zastupanju je valjan samo ako sadrži minimalno sljedeće elemente:

- a) Nazive/imena stranaka,
- b) Trajanje ugovora (ako je primjenjivo),
- c) Iznos naknade za usluge nogometnog/fudbalskog zastupnika,
- d) Priroda/vrsta usluga nogometnog/fudbalskog zastupnika koje će biti pružene i
- e) Potpise stranaka.

(2) Nogometni/fudbalski zastupnik može pružati usluge nogometnog/fudbalskog zastupnika i „ostale usluge“ samo jednoj strani u istoj transakciji.

(3) Izuzetno od pravila iz stava (2) ovog člana, nogometnom/fudbalskom zastupniku će biti dopušteno dvojno zastupanje pojedinca i subjekta koji angažuje u istoj transakciji, pod uslovom da mu oba klijenta daju prethodnu izričitu pisanu saglasnost.

(4) Nogometni/fudbalski zastupnik ne može pružati usluge nogometnog/fudbalskog zastupnika ili ostale usluge u istoj transakciji za:

- a) Subjekat koji se napušta i pojedinca ili
- b) Subjekat koji se napušta i subjekat koji angažuje ili
- c) Sve strane unutar iste transakcije.

(5) Nogometni/fudbalski zastupnik i povezani nogometni/fudbalski zastupnik ne smiju pružati usluge nogometnog/fudbalskog zastupnika ili ostale usluge za različite klijente u istoj transakciji, osim u skladu sa stavom (3) ovog člana.

(6) Svaki ugovor o transferu ili ugovor o radu, a koji je zaključen u transakciji posredstvom aktivnosti nogometnog/fudbalskog zastupnika, mora sadržavati ime klijenta, ime nogometnog/fudbalskog zastupnika, broj njegove FIFA licence i njegov potpis.

(7) Klijent može pregovarati i dogovoriti transakciju bez angažovanja nogometnog/fudbalskog zastupnika, što u tom slučaju mora biti izričito navedeno u predmetnom ugovoru o transferu ili ugovoru o radu.

(8) Ništava je svaka klauzula ugovora o zastupanju koja:

- a) Ograničava mogućnost pojedinca da samostalno pregovara i zaključi ugovor o radu bez angažovanja nogometnog/fudbalskog zastupnika i/ili,
- b) Kažnjava pojedinca ako samostalno pregovara i/ili zaključi ugovor o radu bez angažovanja nogometnog/fudbalskog zastupnika.

(9) Ugovor o zastupanju može raskinuti bilo koja strana u bilo kojem trenutku ako za to postoji opravdan razlog. Strana koja raskine ugovor o zastupanju bez opravdanog razloga, mora drugoj strani nadoknaditi svu nastalu štetu.

(10) Opravdan razlog za raskid ugovora o zastupanju postoji kada se više ne može razumno očekivati da će ugovorna strana nastaviti ugovorni odnos tokom ugovorenog roka u skladu sa načelom dobre vjere, uključujući ali ne ograničavajući se na sljedeće situacije:

- a) Povlačenje ili suspenzija licence nogometnog/fudbalskog zastupnika,
- b) Zabrana učestvovanja u bilo kojoj aktivnosti vezanoj za nogomet/fudbal,
- c) Zabrana registracije novih igrača, bilo na domaćem ili međunarodnom nivou, u trajanju od najmanje jednog čitavog registracijskog perioda.

Član 8. (Naknada)

(1) Nogometni/fudbalski zastupnik će klijentu naplatiti naknadu za pruženu uslugu u skladu sa odredbama iz ugovora o zastupanju.

(2) Plaćanje naknade za usluge nogometnog/fudbalskog zastupnika u skladu sa odredbama ugovora o zastupanju vrši isključivo klijent nogometnog/fudbalskog zastupnika. Klijent ne može zaključiti ugovor ili ovlastiti bilo koju treću stranu da izvrši plaćanje naknade u njegovo ime.

(3) Izuzetno od pravila iz stava (2) ovog člana, kada nogometni/fudbalski zastupnik zastupa pojedinca, a njihova ugovorena godišnja naknada je manja od 200.000 KM, ne računajući bilo kakva uslovna plaćanja, tada se subjekat koji angažuje može sporazumjeti sa pojedincem da plati naknadu za uslugu za tu transakciju njegovom nogometnom/fudbalskom zastupniku u skladu sa odredbama ugovora o zastupanju.

(4) Za primjenu izuzetka iz stava (3) ovog člana moraju se ispuniti svi sljedeći uslovi:

- a) Plaćanje naknade za uslugu od strane subjekta koji angažuje u ime pojedinca neće utjecati na potraživanje nogometnog/fudbalskog zastupnika prema pojedincu niti smije dovesti nogometnog/fudbalskog zastupnika u bilo kakav zavisan ili podređeni položaj prema subjektu koji angažuje.
- b) Naknada za uslugu koju plaća subjekat koji angažuje u ime pojedinca ne smije biti veća od dogovorene naknade navedene u ugovoru o zastupanju zaključenom između pojedinca i nogometnog/fudbalskog zastupnika.
- c) Subjekt koji angažuje ne može od naknade (plate) pojedinca odbiti bilo koji iznos naknade za uslugu izvršenu u skladu sa stavom (3) ovog člana.

(5) Naknada za uslugu se nogometnom/fudbalskom zastupniku plaća na osnovu izdate fakture.

(6) Nogometni/fudbalski zastupnik ima pravo primiti naknadu za uslugu samo ako naknada odgovara uslugama koje su unaprijed navedene u ugovoru o zastupanju, a ugovor o zastupanju je na snazi u vrijeme kada se izvršavaju predmetne usluge nogometnog/fudbalskog zastupnika.

(7) Ako ugovor o radu traje duže od trajanja pripadajućeg ugovora o zastupanju, nogometni/fudbalski zastupnik može primiti naknadu za uslugu i nakon isteka ugovora o zastupanju sve dok je ugovor o radu pojedinca još uvijek na snazi i pod uslovom da je to izričito dogovoreno s klijentom u ugovoru o zastupanju.

(8) Obaveza plaćanja naknade za usluge nogometnog/fudbalskog zastupnika počinje nakon završetka relevantnog registracijskog perioda i vrši se u tromjesečnim ratama za vrijeme trajanja ugovora o radu.

(9) Samo naknada koju je pojedinac stvarno primio predstavlja osnov za srazmjeran obračun naknade koja se ima platiti za usluge nogometnog/fudbalskog zastupnika.

(10) Ako je ugovor o radu zaključen na period kraći od šest mjeseci, isplata naknade za uslugu nogometnog/fudbalskog zastupnika se vrši jednokratno, po isteku predmetnog ugovora o radu.

(11) Nogometni/fudbalski zastupnik ne može primiti naknadu za pružanje usluga nogometnog/fudbalskog zastupnika u vezi sa maloljetnikom, osim ako taj igrač ne potpisuje svoj prvi profesionalni ugovor ili naredni profesionalni ugovor.

(12) Kada nogometni/fudbalski zastupnik postupa u ime subjekta koji angažuje i pojedinca u istoj transakciji, a prema članu 7. stavu (3) ovog Pravilnika, subjekat koji angažuje može platiti do 50% ukupne dugovane naknade za uslugu nogometnog/fudbalskog zastupnika.

(13) Subjekt koji se napušta će platiti naknadu za uslugu nogometnog/fudbalskom zastupniku po primitku svake rate (iznosa) koja predstavlja naknadu za transfer, a koja se plaća subjektu koji se napušta. Subjekt koji se napušta će odmah obavijestiti nogometnog/fudbalskog zastupnika o svim takvim zaprimljenim ratama (naknadama).

(14) Nogometni/fudbalski zastupnik nema pravo na naknade za uslugu koja još nije dospjela, a u slučajevima kada:

- a) Pojedinac pređe u drugi subjekat koji angažuje prije isteka dogovorenog ugovora o radu ili
- a) Pojedinac prijevremeno raskine ugovor o radu bez opravdanog razloga, a nogometni/fudbalski zastupnik i dalje zastupa pojedinca u trenutku takvog raskida.

(15) Sva plaćanja naknada za usluge nogometnim/fudbalskim zastupnicima trebaju se vršiti putem platforme „FIFA Clearing House“ u skladu sa relevantnim FIFA Clearing House Pravilnikom.

Član 9. (Zastupanje maloljetnika)

(1) Pristup maloljetniku ili njegovom zakonskom zastupniku/staratelju (i/ili svako naknadno zaključivanje ugovora o zastupanju) u vezi sa bilo kojim uslugama nogometnog/fudbalskog zastupnika dozvoljen je najranije šest mjeseci prije nego što maloljetnik navrší godine kada može samostalno potpisati svoj prvi profesionalni ugovor u skladu sa relevantnim zakonskim propisima u BiH, odnosno, najranije šest mjeseci prije njegovog petnaestog rođendana. Pristup se može izvršiti samo nakon prethodnog pisanog pristanka zakonskog zastupnika/staratelja maloljetnika.

(2) Nogometni/fudbalski zastupnik koji želi zastupati maloljetnika ili zastupati klub u transakciji koja uključuje transfer maloljetnika mora uspješno završiti predviđeni „CPD kurs za maloljetnike“, a koji se vrši putem Platforme i ispuniti sve zahtjeve za zastupanje maloljetnika ukoliko su utvrđene relevantnim zakonskim propisima u BiH.

(3) Ugovor o zastupanju između nogometnog/fudbalskog zastupnika i maloljetnika bit će obavezujući samo ako:

- a) Ugovor o zastupanju ispunjava minimalne zahtjeve navedene u članu 7. stavu 1. ovog Pravilnika,
- b) Nogometni/fudbalski zastupnik postupa u skladu sa stavovima (1) i (2) ovog člana i
- c) Ugovor o zastupanju su potpisali maloljetnik i njegov zakonski zastupnik/staratelj u skladu sa relevantnim zakonskim propisima u BiH.

(4) Za kršenje odredbe iz stava (1) ovog člana, nogometni/fudbalski zastupnici će biti kažnjeni najmanje novčanom kaznom i suspenzijom licence nogometnog/fudbalskog zastupnika u trajanju do dvije godine.

Član 10. (Ograničenja naknade)

(1) Naknada za uslugu koja se plaća nogometnom/fudbalskom zastupniku za pružanje usluga nogometnog/fudbalskog zastupnika izračunava se kako slijedi:

- a) Kada se zastupa pojedinac ili subjekat koji angažuje: na osnovu primanja (plata) pojedinca,
- b) Kada se zastupa subjekat koji se napušta: na osnovu naknade za transfer u predmetnoj transakciji.

(2) Najveći iznos naknade koji se može platiti za pružanje usluga nogometnog/fudbalskog zastupnika u transakciji, bez obzira na broj nogometnih/fudbalskih zastupnika koji pružaju usluge nogometnog/fudbalskog zastupnika određenom klijentu utvrđuje se kako slijedi:

- a) Ako je klijent pojedinac ili subjekat koji angažuje, a ukupna godišnja primanja (plate) pojedinca su manja ili jednaka 200.000 KM, maksimalna ukupna naknada koja se plaća za usluge nogometnog/fudbalskog zastupnika u toj transakciji iznosi 5% od ukupnih godišnjih primanja (plata) pojedinca.
- b) Ako su klijenti i pojedinac i subjekat koji angažuje (dopušteno dvojno zastupanje iz člana 7. stava (3) ovog Pravilnika), a ukupna godišnja primanja (plate) pojedinca su manja ili jednaka 200.000 KM, maksimalna ukupna naknada koja se plaća za usluge nogometnog/fudbalskog zastupnika u toj transakciji iznosi 10% od ukupnih godišnjih primanja (plata) pojedinca.
- c) Ako je klijent pojedinac ili subjekat koji angažuje, a ukupna godišnja primanja (plate) pojedinca su veća od 200.000 KM, maksimalna ukupna naknada koja se plaća za usluge nogometnog/fudbalskog zastupnika u toj transakciji iznosi 3% od ukupnih godišnjih primanja pojedinca.
- d) Ako su klijenti i pojedinac i subjekat koji angažuje (dopušteno dvojno zastupanje iz člana 7. stava (3) ovog Pravilnika), a ukupna godišnja primanja (plate) pojedinca su veća od 200.000 KM, maksimalna ukupna naknada koja se plaća za usluge nogometnog/fudbalskog zastupnika u toj transakciji iznosi 6% od ukupne godišnje naknade pojedinca.
- e) Ako je klijent subjekat koji se napušta, maksimalna ukupna naknada koja se plaća za usluge nogometnog/fudbalskog zastupnika u toj transakciji iznosi 10% od ukupne naknade za transfer koja se plaća subjeku koji se napušta.

(3) Radi izbjegavanja bilo kakvih nejasnoća, primjenjuju se sljedeći principi:

- a) Prilikom utvrđivanja ukupnih primanja (plata) pojedinca na osnovu kojih se određuje maksimalan iznos naknade za usluge nogometnog/fudbalskog zastupnika ne mogu se uzimati u obzir, odnosno uračunavati, bilo kakva uslovna plaćanja.
- b) Ako su primanja pojedinca veća od 200.000 KM, godišnji višak koji premašuje taj

iznos podliježe ograničenju naknade za uslugu od 3% ako nogometni/fudbalski zastupnik zastupa pojedinca ili subjekat koji angažuje ili 6% ako je u pitanju predstavljanje i subjekta koji angažuje i pojedinca (dopušteno dvojno zastupanje iz člana 7. stava (3) ovog Pravilnika).

- c) Kod utvrđivanja ukupne naknade za transfer ne uzimaju se u obzir:
1. Iznos isplaćen kao naknada za kršenje ugovora u skladu s članom 17. ili Aneksom 2 RSTP, odnosno, relevantnim odredbama Pravilnika o registracijama klubova i igrača i statusu i transferu igrača NS/FS BiH i/ili
 2. Bilo koja ugovorom ranije utvrđena naknada za prodaju (sell-on fee), procenat od budućeg transfera i sl.

(4) Ako nogometni/fudbalski zastupnik ili povezani nogometni/fudbalski zastupnici u periodu od 24 (dvadesetčetiri) mjeseca prije ili nakon transakcije, obavlja/ju druge usluge za klijenta uključenog u tu transakciju, pretpostavlja se da su ostale usluge predstavljale dio usluga nogometnog/fudbalskog zastupnika izvršene u toj konkretnoj transakciji, osim ako se ne dokaže suprotno.

(5) Ako nogometni/fudbalski zastupnik i/ili klijent ne uspije pobiti pretpostavku iz stava (4) ovog člana, naknade plaćene za ostale usluge smatrat će se dijelom naknade plaćene za usluge nogometnog/fudbalskog zastupnika u toj transakciji.

III – PRAVA I OBAVEZE

Član 11.

(Prava i obaveze nogometnog/fudbalskog zastupnika)

(1) Nogometni/fudbalski zastupnik:

- a) Može pružati usluge nogometnog/fudbalskog zastupnika svakom klijentu sa kojim zaključi pisani ugovor o zastupanju, a koji sadrži minimalne uslove predviđene članom 7. ovog Pravilnika, odnosno, članom 12. FIFA Pravilnika o nogometnim/fudbalskim zastupnicima,
- b) Neće pristupiti klijentu koji je zaključio ekskluzivni ugovor o zastupanju sa drugim nogometnim/fudbalskim zastupnikom. Izuzetno, navedeno neće važiti u posljednja dva mjeseca trajanja tog ekskluzivnog ugovora o zastupanju,
- c) Neće zaključivati ugovor o zastupanju s klijentom koji je vezan ekskluzivnim ugovorom o zastupanju s drugim nogometnim/fudbalskim zastupnikom, osim u posljednja dva mjeseca trajanja tog ekskluzivnog ugovora o zastupanju.

(2) Nogometni/fudbalski zastupnici će:

- a) Uvijek djelovati u najboljem interesu svojih klijenata;
- b) Poštovati i pridržavati se Statuta, propisa, direktiva i odluka nadležnih tijela FIFA-e, UEFA-e i drugih konfederacija i Saveza;
- c) Izbjegavati sukobe interesa za vrijeme pružanja usluga nogometnog/fudbalskog zastupnika;
- d) Osigurati da se njihovo ime, broj licence, potpis i ime njihovog klijenta pojave u svim ugovorima koji budu zaključeni posredstvom njihovih pruženih usluga;
- e) Uvijek ispunjavati zahtjeve podobnosti dok god posjeduju FIFA-inu licencu, kako je opisano u članovima 5. i 17. FIFA Pravilnika o nogometnim/fudbalskim zastupnicima;
- f) Platiti godišnju naknadu za licencu FIFA-i u roku navedenom na Platformi, kako je opisano u članovima 7. i 17. FIFA Pravilnika o nogometnim/fudbalskim

zastupnicima;

- g) Ispunjavati zahtjeve CPD-a, kako je opisano u članovima 9. i 17. FIFA Pravilnika o nogometnim/fudbalskim zastupnicima;
- h) Pridržavati se tekućih zahtjeva za objavljivanjem i izvještavanjem, kao što je opisano u tački j) ovog stava;
- i) Odmah prijaviti bilo kakvo kršenje ovog Pravilnika ili pravilnika, propisa ili kodeksa ponašanja FIFA-e, UEFA-e ili drugih konfederacija ili Saveza nadležnom organu ili tijelu;
- j) Unositi na Platformu kako slijedi:
 - 1. Relevantne ugovore o zastupanju i informacije koje se traže na Platformi u roku od 14 (četrnaest) dana od trenutka izmjene ili raskida ugovora o zastupanju;
 - 2. Bilo koji ugovor sa klijentom osim ugovora o zastupanju, uključujući ali ne ograničavajući se na ugovore koji se odnose na ostale usluge i informacije tražene na Platformi u roku od 14 (četrnaest) dana od dana zaključivanja;
 - 3. U roku od 14 (četrnaest) dana od dana plaćanja naknade za uslugu: informacije koje se traže na Platformi;
 - 4. U roku od 14 (četrnaest) dana od dana plaćanja naknade u vezi sa bilo kojim ugovorom zaključenim sa klijentom, a koji nije ugovor o zastupanju: informacije koje se traže na Platformi;
 - 5. Svaki ugovorni ili drugi aranžman između nogometnih/fudbalskih zastupnika o saradnji u pružanju bilo koje usluge ili dijeljenju prihoda ili dobiti od bilo kojeg dijela njihovih usluga nogometnih/fudbalskih zastupnika, u roku od 14 (četrnaest) dana od dana zaključivanja;
 - 6. Sve informacije koje mogu utjecati na obvezu ispunjavanja zahtjeva podobnosti u roku od 14 (četrnaest) dana od dana nastanka i
 - 7. Svaki ugovor o nagodbi zaključen sa klijentom ili drugim nogometnim/fudbalskim zastupnikom u roku od 14 (četrnaest) dana od dana zaključivanja.
- k) Ukoliko svoje poslovne aktivnosti obavljaju putem agencije, nogometni/fudbalski zastupnik će na Platformu unijeti:
 - 1. U roku od 14 (četrnaest) dana od dana prve transakcije koja uključuje agenciju: njenu vlasničku strukturu, identitet dioničara, postotak u vlasništvu u njenom osnovnom kapitalu i/ili identitet njenih stvarnih vlasnika;
 - 2. U roku od 14 (četrnaest) dana od dana prve transakcije koja uključuje agenciju: broj nogometnih/fudbalskih zastupnika koji koriste istu agenciju za obavljanje svojih poslovnih aktivnosti i imena svih njenih zaposlenika i
 - 3. U roku od 30 (trideset) dana od dana nastanka: sve promjene koje nastanu u prethodno navedenim informacijama datim u vezi sa agencijom.

(3) Nogometni/fudbalski zastupnik ne smije učiniti ili pokušati učiniti sljedeće:

- a) Pristupati, pregovarati, poduzimati bilo kakve aktivnosti, tražiti ili na bilo koji način omogućiti razgovore između strana u cilju transakcije (uključujući davanje izjava za medije) bilo kojeg pojedinca, sa ciljem navođenja na prijevremeni raskid njihovog ugovora o radu bez opravdanog razloga ili kršenja bilo koje obveze iz njihovog ugovora o radu.
- b) Nuditi ili plaćati bilo kakvu neopravdanu ličnu, novčanu ili drugu korist, bilo direktno ili indirektno:
 - 1. Bilo kojem službeniku ili zaposleniku nekog saveza ili kluba u vezi sa uslugama nogometnog/fudbalskog zastupnika ili
 - 2. Pojedinca (ili bilo kojem članu porodice ili staratelju ili prijatelju tog pojedinca) u vezi sa ugovorom o zastupanju s tim nogometnim/fudbalskim zastupnikom.
- c) Sakriti materijalne činjenice od klijenta, uključujući ali ne ograničavajući se na:

1. Propuštanje prijave sukoba interesa (čak i ako je takav sukob interesa dopušten u skladu sa odredbama ovog Pravilnika) ili
 2. Propuštanje prijave pisane ponude klijentu (date putem bilo kojeg sredstva komunikacije).
- d) Nepoštivati ograničenje naknade utvrđeno ovim Pravilnikom, bilo direktno ili indirektno, uključujući ali ne ograničavajući se na namjerno povećanje naknade za uslugu koja se naplaćuje ili bi inače bila naplaćena klijentu za druge usluge.
 - e) Prihvatiti isplatu bilo koje naknade za transfer ili nagrade za trening koja se plaća u vezi sa igračevim transferom između klubova. To uključuje, bez ograničenja, sva prava kako je opisano u članu 18ter RSTP-a, odnosno relevantnoj odredbi Pravilnika o regidtracijama klubova i igrača i statusu i transferu igrača NS/FS BiH.
 - f) Biti uključen, bilo direktno ili indirektno, u prenosni transfer kako je definisano u RSTP-u ili posjedovati ili imati bilo kakva prava koja se odnose na registraciju igrača, kršeći član 18bis ili član 18ter RSTP-a, odnosno relevantnih odredaba Pravilnika o regidtracijama klubova i igrača i statusu i transferu igrača NS/FS BiH ili
 - g) Prekršiti odredbe ovog Pravilnika na bilo koji drugi način.
- (4) U pogledu otkrivanja i izvještavanja, nogometni/fudbalski zastupnik će:
- a) Odmah obavijestiti klijenta o svakoj pisanoj ponudi (datoj putem bilo kojeg sredstva komunikacije) koju su primili u vezi sa svojim klijentom, a u suprotnom, podliježu disciplinskoj odgovornosti u skladu sa odredbama Disciplinskog pravilnika NS/FS BiH;
 - b) Pružiti klijentu, na zahtjev, kopiju relevantnog ugovora o zastupanju ili bilo kojeg drugog pisanog sporazuma u vezi sa ostalim uslugama, kopiju ugovora o radu ili bilo koji drugi pisani dokument dobijen u vezi sa uslugama nogometnog/fudbalskog zastupnika, raspored pojedinosti plaćanja bilo koje vrste izvršenih prema nogometnom/fudbalskom zastupniku u vezi sa transakcijom u kojoj su bili uključeni i
 - c) Na zahtjev, sarađivati s nadležnim tijelom svakog saveza, UEFA-e ili druge konfederacije i/ili FIFA-e u pogledu bilo kojeg zahtjeva za bilo kojom vrstom informacije u bilo kojem obliku.
- (5) Sve odredbe ovog člana odnose se kako na domaće tako i na međunarodne transakcije.

Član 12. **(Usklađenost s tekućim zahtjevima licenciranja)**

- (1) Licenca se automatski privremeno oduzima ako nogometni/fudbalski zastupnik:
- a) Ne ispunjava zahtjeve podobnosti u bilo kojem trenutku;
 - b) Ne plati godišnju naknadu za licencu FIFA-i u roku navedenom na Platformi;
 - c) Ne ispuni zahtjeve CPD-a u kalendarskoj godini ili
 - d) Ne ispuni svoje obaveze izvještavanja.
- (2) Generalni sekretarijat FIFA-e odgovoran je za provjeru usklađenosti sa zahtjevima iz stava (1) ovog člana.
- (3) U slučaju navedenom u stavu (1) tački a) ovog člana:
- a) Generalni sekretarijat FIFA-e će obavijestiti nogometnog/fudbalskog zastupnika da postoje razlozi za sumnju da ne isti ispunjava zahtjeve podobnosti i o automatskoj privremenoj suspenziji i
 - b) Predmet će biti prosljeđen FIFA Disciplinskom komitetu na odlučivanje.

(4) Ako se utvrdi postojanje jedne ili više okolnosti navedenih u stavu (1) tačkama b), c) ili d) ovog člana:

- a) Generalni sekretarijat FIFA-e će obavijestiti nogometnog/fudbalskog zastupnika o njihovom nepoštivanju i automatskoj privremenoj suspenziji i
- b) Ako nogometni/fudbalski zastupnik ne ispravi neusklađenost u roku od 60 (šezdeset) dana nakon što mu je licenca automatski privremeno suspendovana, licenca će tom nogometnom/fudbalskom zastupniku biti povučena.

(5) U slučaju povlačenja licence (privremeno ili trajno) Savez će, po saznanju za suspenziju, u elektroničkom informacionom sistemu istu evidentirati te za vrijeme trajanja suspenzije neće priznavati transakcije niti ugovore u čijem zaključivanju i realizaciji su učestvovali klijenti članovi Saveza i suspendovani nogometni/fudbalski zastupnici.

IV – PRAVA I OBAVEZE KLIJENATA

Član 13. (Angažovanje nogometnih/fudbalskih zastupnika)

(1) Klijenti:

- a) Mogu angažovati nogometnog/fudbalskog zastupnika za obavljanje usluga nogometnog/fudbalskog zastupnika pod uslovom da ne odluče samostalno poduzimati takve aktivnosti;
- b) Su dužni platiti naknadu za uslugu dogovorenu sa nogometnim/fudbalskim zastupnikom u roku koji je utvrđen ovim Pravilnikom i u skladu sa odgovarajućim ugovorom o zastupanju, ugovorom o radu i ugovorom o transferu (kako je dogovoreno);
- c) Će provjeriti da je nogometni/fudbalski zastupnik adekvatno licenciran od strane FIFA-e prije potpisivanja relevantnog ugovora o zastupanju;
- d) Će saradivati sa nadležnim tijelom Saveza, UEFA-e ili druge konfederacije i/ili FIFA-e u pogledu bilo kojeg zahtjeva u vezi sa nogometnim/fudbalskim zastupnikom od strane tih tijela;
- e) Mogu zatražiti od nogometnog/fudbalskog zastupnika raspored sa detaljima svih plaćanja bilo koje vrste (uključujući sva plaćanja, naknade i troškove) izvršene od strane i/ili u vezi sa tim klijentom;
- f) Ako su klijenti klubovi, isti u roku od 14 (ćetrnaest) dana od dana nastupa predmetnih okolnosti moraju unijeti u FIFA Transfer Matching System (TMS) sljedeće:
 - 1. Informacije koje se traže u TMS-u po završetku svake transakcije koja predstavlja međunarodni transfer u koji je klub ukljućen;
 - 2. Svaku izmjenu ili raskid relevantnog ugovora o zastupanju;
 - 3. Bilo koji ugovor sa nogometnim/fudbalskim zastupnikom razlićit od ugovora o zastupanju, uključujući, ali ne ogranićavajući se na ostale usluge i informacije tražene u TMS-u;
 - 4. Informacije koje se traže u TMS-u nakon plaćanja naknade u vezi sa bilo kojim ugovorom zakljućenim sa nogometnim/fudbalskim zastupnikom razlićitim od ugovora o zastupanju te
- g) Moraju odmah prijaviti bilo koje kršenje ovog Pravilnika ili drugih propisa Saveza, FIFA Pravilnika o nogometnim/fudbalskim zastupnicima ili propisa UEFA-e.

(2) Klijenti (i njihovi službenici, ako je primjenjivo) ne smiju učestvovati ili pokušati učestvovati u sljedećem:

- a) Angažovati ili imenovati nelicenciranu osobu za pružanje usluga nogometnog/fudbalskog zastupnika;
- b) Prihvatiti ili zatražiti bilo kakvu neopravdanu ličnu, novčanu ili drugu korist od nogometnog/fudbalskog zastupnika;
- c) Dati, ponuditi ili nastojati ponuditi naknadu ili obećanje bilo koje vrste, direktno ili indirektno, nogometnom/fudbalskom zastupniku (ili bilo kojem članu porodice ili drugoj osobi povezanoj sa tim nogometnim/fudbalskim zastupnikom), osim dogovorene naknade za uslugu;
- d) Za saveze ili klubove – miješati se ili utjecati na slobodu pojedinca da odabere nogometnog/fudbalskog zastupnika;
- e) Učestvovati ili pomagati, direktno ili indirektno, u bilo kojem obliku nepošivanja ograničenja naknade za uslugu nogometnog/fudbalskog zastupnika koja je utvrđena ovim Pravilnikom;
- f) Imati interes u agenciji ili poslovima nogometnog/fudbalskog zastupnika, u skladu sa članom 11. stavom 4. FIFA Pravilnika o nogometnim/fudbalskim zastupnicima;
- g) Za saveze ili klubove – bilo direktno ili indirektno, navesti ili prisiliti pojedinca da prekrši uslove ugovora o zastupanju sa svojim nogometnim/fudbalskim zastupnikom;
- h) Propustiti odmah prijaviti FIFA-i bilo kakvo kršenje ovog Pravilnika ili FIFA Pravilnika o nogometnim/fudbalskim zastupnicima;
- i) Dopustiti nogometnom/fudbalskom zastupniku ili njegovoj agenciji da ima interes i uključenost u njihove strukture ili
- j) Bilo kojem drugom kršenju odredaba ovog Pravilnika.

V – PRIJAVLJIVANJE I OBJAVLJIVANJE PODATAKA

Član 14. (Otkrivanje i objavljivanje)

(1) Otkrivanje i objavljivanje podataka će se vršiti u skladu sa članom 19. FIFA Pravilnika o nogometnim/fudbalskim zastupnicima.

(2) FIFA će staviti na raspolaganje imena i pojedinosti vezane za sve nogometne/fudbalske zastupnike, klijente koje nogometni/fudbalski zastupnici zastupaju, ekskluzivnost ili neekskluzivnost njihovog zastupanja te datum isteka ugovora o zastupanju, usluge nogometnog/fudbalskog zastupnika koje se pružaju svakom klijentu, sve sankcije izrečene nogometnim/fudbalskim zastupnicima i/ili klijentima i pojedinosti o svim transakcijama koje uključuju nogometne/fudbalske zastupnike, uključujući iznose naknade za usluge plaćene nogometnim/fudbalskim zastupnicima.

(2) Klijenti, članovi nogometne/fudbalske organizacije BiH, su dužni da Savezu dostave sve detalje uključujući ali ne ograničavajući se na imena/nazive nogometnih/fudbalskih zastupnika/agencija uključenih u domaće transakcije klubova, brojeve njihovih FIFA licenci, podatke o dogovorenim naknadama ili plaćanjima bilo koje prirode, a koje su isplaćene ili trebaju biti isplaćene nogometnim/fudbalskim zastupnicima za usluge pružene u domaćim transakcijama, kao i sve druge tražene pojedinosti vezane za zastupanje regulisano ovim Pravilnikom.

(3) Klijenti članovi nogometne/fudbalske organizacije BiH su dužni postići dogovor sa nogometnim/fudbalskim zastupnicima kako bi osigurali da ne postoje prepreke za otkrivanje informacija i dokumentacije.

(4) Nadležna služba Saveza će, u pravilu, a najkasnije 30 (trideset) dana po završetku svakog registracijskog perioda, zatražiti od klijenata članova nogometne/fudbalske organizacije BiH dostavu podataka iz stava (2) ovog člana i to direktno članovima koji se takmiče u takmičenjima u organizaciji Saveza, a indirektno, putem saveza koji rukovode nižim rangovima takmičenja, od klijenata koji se takmiče u takmičenjima tih nivoa.

(5) Ako klijenti članovi nogometne/fudbalske organizacije BiH ne dostave tražene podatke po zahtjevu nadležne službe Saveza, u roku koji ne može biti duži od 30 (trideset) dana ili ako nadležne službe za verifikaciju bilo kojeg saveza koji pripada nogometnog/fudbalskoj organizaciji BiH dođu do saznanja da je ugovor zaključen uz korištenje usluga nogometnog/fudbalskog zastupnika u ime igrača i/ili kluba, a da isto nije navedeno u ugovoru, informacije o navedenim saznanjima će se dostaviti Komitetu za status igrača i transfere NS/FS BiH, koji će pokrenuti postupak protiv klijenata pred Disciplinskom komisijom NS/FS BiH ili disciplinskom komisijom relevantnog entitetskog saveza, zbog kršenja odredaba ovog Pravilnika.

(6) Informacije o nepoštivanju odredaba ovog Pravilnika te provedenim postupcima će se obavezno dostaviti FIFA-i.

VI - REGISTRACIJA NOGOMETNIH/FUDBALSKIH ZASTUPNIKA

Član 15. (Registracija)

(1) Registracija nogometnih/fudbalskih zastupnika vrši se u cilju vođenja evidencija nogometnih/fudbalskih zastupnika koji pružaju usluge nogometnog/fudbalskog zastupnika u skladu sa članom 2. ovog Pravilnika.

(2) Registracija se vrši putem elektroničkog informacionog sistema od strane nadležne službe Saveza, a taj proces je nezavisan od registracije nogometnog/fudbalskog zastupnika kod FIFA-e putem Platforme i vrši se:

- a) po službenoj dužnosti, na osnovu informacija vidljivih iz ugovora potpisanih između igrača i klubova,
- b) po saznanju na bilo koji način, osim na način naveden u stavu (1) ovog člana, da su u određenoj transakciji korištene usluge nogometnog/fudbalskog zastupnika u kojem slučaju može biti pokrenut disciplinski postupak protiv klijenta člana Saveza,
- c) po zahtjevu nogometnog/fudbalskog zastupnika i/ili klijenata.

(3) U elektronički informacioni sistem se unose osnovni podaci o nogometnom/fudbalskom zastupniku, odnosno, ime, prezime, sjedište/prebivalište, e-mail adresa, broj telefona i broj FIFA-ine licence.

(4) Zahtjev za registraciju nogometnog/fudbalskog zastupnika u skladu sa stavom (2) tačkom c) ovog člana podnosi se putem forme za prijavu nogometnog/fudbalskog zastupnika, dostupne na zvaničnoj web stranici Saveza ili putem zvanične e-mail adrese: info@nsbih.ba. Na isti način, svako lice koje ima saznanja, može izvršiti prijavu da su u određenoj transakciji korištene usluge nogometnog/fudbalskog zastupnika.

(5) Prilikom verifikacije bilo kojeg ugovora (uključujući i sporazume o ustupanju) potpisanog između kluba i igrača, unesenog u elektronički informacioni sistem, nadležna služba Saveza ili entitetskih saveza će, prije verifikacije ugovora/sporazuma, provjeriti da li je ugovor/sporazum zaključen uz korištenje usluga nogometnog/fudbalskog zastupnika

u ime igrača i/ili kluba te da li su u ugovoru navedeni minimalno sljedeći podaci: ime i prezime/naziv nogometnog/fudbalskog zastupnika, njegova adresa/sjedište, broj FIFA-ine licence i potpis.

(6) Ako se pregledom ugovora/sporazuma utvrdi da su pri zaključenju istog korištene usluge nogometnog/fudbalskog zastupnika, nadležna služba Saveza će, po službenoj dužnosti, izvršiti registraciju nogometnog/fudbalskog zastupnika u elektroničkom informacionom sistemu.

(7) Ako nadležne službe za verifikaciju ugovora entitetskih saveza pri pregledu ugovora utvrde da je ugovor zaključen uz korištenje usluga nogometnog/fudbalskog zastupnika u ime igrača i/ili kluba, ista će o tome promptno obavijestiti nadležnu službu za verifikaciju Saveza, koja će postupiti u skladu sa odredbom stava (2) ovog člana.

(8) Ako nadležne službe Saveza utvrde da je ugovor zaključen uz korištenje usluga nogometnog/fudbalskog zastupnika u ime igrača i/ili kluba ali da u ugovoru nisu navedeni podaci navedeni u stavu (5) ovog člana, nadležne službe Saveza za verifikaciju ugovora će zatražiti od klubova izmjene i dopune ugovora u dijelu koji se odnosi na prednje navedeno, a ukoliko klubovi ne postupe u skladu sa navedenim, protiv klijenta člana koji je odbio postupiti po nalogu nadležne Službe će putem Komiteta za status igrača i transfere NS/FS BiH biti pokrenut disciplinski postupak.

VII – SPOROVI

Član 16. (Nadležnost)

(1) Nadležnost FIFA-e za rješavanje sporova predviđena je FIFA Pravilnikom o nogometnim/fudbalskim zastupnicima.

(2) Bez obzira na pravo nogometnog/fudbalskog zastupnika ili klijenta da traži pravnu zaštitu pred redovnim sudovima, nadležnost da u prvom stepenu odlučuju o sporovima koji proizlaze ili su u vezi sa ugovorom o zastupanju (koji nema međunarodni karakter) imaju nadležne komisije za status i transfer igrača opštinskih/gradskih/područnih/kantonalnih/županijskih saveza kod kojih je registrovan klub (ako je klijent klub) ili komisije za status i transfer igrača opštinskih/gradskih/područnih/kantonalnih/županijskih saveza kod kojih je registrovan klub u kojem je zaposlen/angažovan igrač ili trener (ako je klijent pojedinac).

(3) Po žalbama protiv odluka prvostepenih organa, u slučaju da je podnosilac žalbe klub koji se takmiči u takmičenjima kojima rukovodi Savez ili pojedinac koji ima potpisan ugovor o radu ili ugovor o angažovanju sa klubom koji se takmiči u prednje navedenim takmičenjima ili nogometni/fudbalski zastupnik prednje navedenih klijenata, nadležnost za odlučivanje ima Komitet za status igrača i transfere NS/FS BiH, dok će o žalbama svih ostalih klijenata i njihovih nogometnih/fudbalskih zastupnika u drugom stepenu, kao nadležni organ odlučivati komisije za status igrača entitetskih saveza.

VIII – POSEBNE ODREDBE VEZANE ZA RJEŠAVANJE SPOROVA

Član 17. (Poštivanje ugovora)

(1) Ugovor potpisan između klijenta i nogometnog/fudbalskog zastupnika može prestati

po isteku njegovog trajanja ili međusobnim sporazumom.

Član 18.

(Raskid ugovora zbog opravdanog razloga)

(1) Kad postoji opravdani razlog, svaka strana može raskinuti ugovor bez plaćanja naknade drugoj ugovornoj strani.

(2) Svako ponašanje jedne ugovorne strane s ciljem prisiljavanja druge ugovorne strane na raskid ugovora ili izmjene odredaba ugovora, daje drugoj ugovornoj strani pravo na raskid ugovora iz opravdanog razloga.

(3) U slučaju da klijent nezakonito propusti isplatiti nogometnom/fudbalskog zastupniku naknadu na dan njenog dospijeća, smatrat će se da nogometni/fudbalski zastupnik ima opravdan razlog za raskid ugovora, pod uslovom da je dužnika (klijenta) pisanim putem upozorio o neplaćanju i ostavio mu rok od najmanje 15 (petnaest) dana u kojem je klijent dužnik bio dužan u potpunosti ispuniti svoje finansijske obaveze.

Član 19.

(Posljedice raskida ugovora bez opravdanog razloga)

(1) U svim slučajevima raskida ugovora bez opravdanog razloga, strana koja raskida ugovor plaća drugoj strani naknadu.

(2) Osim ako je drugačije predviđeno ugovorom, naknada koja pripada nogometnom/fudbalskom zastupniku ili klijentu u slučaju raskida ugovora bez opravdanog razloga predstavlja faktičko pitanje i izračunava se od slučaja do slučaja, na osnovu okolnosti svakog posebnog slučaja, a naročito na osnovu visine štete i troškova koji su nastali nedužnoj ugovornoj strani u vezi sa raskidom ugovora, posvećujući dužnu pažnju naročito na preostalu ili plaćenu naknadu prema raskinutom ugovoru.

(3) Pravo na naknadu ne može se prenijeti na treću stranu.

Član 20.

(Rad prvostepenog i drugostepenog organa)

(1) Nadležni organi neće rješavati sporove ako su prošle više od 2 (dvije) godine od događaja koji je doveo do spora. U svakom pojedinačnom slučaju bit će ispitano da li je taj rok istekao.

(2) Nadležni prvostepeni organ dužan je donijeti odluku o zahtjevu za rješavanje spora u roku od 30 (trideset) dana od dana prijema zahtjeva. Odluka se dostavlja svim zainteresovanim stranama u pisanoj formi sa obrazloženjem.

(3) Protiv odluke prvostepenog organa, nezadovoljna strana može uložiti žalbu drugostepenom organu u roku od osam dana od dana prijema prvostepene odluke.

(4) Drugostepeni organ je dužan donijeti odluku po žalbi u roku do 30 (trideset) dana od dana podnošenja žalbe, osim kada je usljed opravdanih okolnosti neophodno produžiti prednje navedeni rok, a koji ne može biti duži od dodatnih 30 (trideset) dana.

(5) Prvostepena odluka postaje pravosnažna ukoliko po isteku žalbenog roka nijedna od strana u sporu nije uložila žalbu protiv prvostepene odluke ili ako su se stranke pisanim putem odrekle prava na žalbu.

(6) Odluke drugostepenog organa su konačne te protiv istih nije dopuštena žalba.

Član 21.

(Nadležnost za vođenje postupka)

- (1) Prije pokretanja postupka, prvostepeni i drugostepeni organi utvrđuju svoju nadležnost za vođenje postupka.
- (2) Ako se organ iz stava 1. ovog člana oglasi nenadležnim za vođenje postupka, obavezan je odmah, a najkasnije u roku do pet dana, predmet dostaviti nadležnom organu.
- (3) Sukob nadležnosti organa rješava zajednički neposredno viši organ.

Član 22.

(Odbacivanje zahtjeva/žalbe)

- (1) Nadležni organ neće pokrenuti postupak, nego će svojom odlukom odbaciti zahtjev/žalbu zbog sljedećih razloga:
 - a) Ako je zahtjev/žalba podnesena od neovlaštenog lica,
 - b) Kad radnja opisana u zahtjevu/žalbi ne predstavlja povredu odredbi ovog Pravilnika,
 - c) Ako se protiv lica iz određenih razloga ne može voditi postupak,
 - d) Ako nadležni organ već vodi postupak ili je donio odluku,
 - e) Ako je nastupila zastara,
 - f) Ako zahtjev/žalba nije adekvatno taksirana.

- (2) Protiv odluke iz stava 1. ovog člana žalba nije dozvoljena.

Član 23.

(Rokovi)

- (1) Rokovi predviđeni ovim Pravilikom ne mogu se produžavati.
- (2) Rokovi u postupcima koji se vode zbog povreda ovog Pravilnika se računaju na sljedeći način:
 - a) Ako se rok računa po danima, dan u kojem je izvršeno saopštavanje ili dostavljanje se ne računa u rok, nego se za početak roka računa prvi naredni dan.
 - b) Na početak i tok roka ne utiče činjenica da su određeni dani neradni, ali ako posljednji dan roka pada u neradni dan, onda rok ističe sa protokom prvog narednog radnog dana.
 - c) Kada je podnesak upućen putem pošte preporučenom pošiljkom, dan predaje pošti smatra se kao dan predaje onome kome je upućen.

- (3) Ako je podnesak koji je vezan za rok, zbog neznanja ili očigledne greške podnosioca predat ili upućen nenadležnom organu prije isteka roka, pa nadležnom organu stigne poslije isteka roka, smatraće se da je na vrijeme podnesen.

Član 24.

(Takse)

- (1) Taksa za vođenje postupka obavezno se plaća na:
 - a) Sve zahtjeve za rješavanje spornog odnosa i
 - b) Žalbe podnesene protiv odluka prvostepenog organa,
- (2) Visine taksi utvrđuju se odlukama izvršnih odbora nadležnih saveza čiji organi su nadležni za rješavanje sporova u prvom i drugom stepenu i objavljuju u službenim glasnicima tih saveza.

Član 25.
(Troškovi postupka)

(1) U postupcima rješavanja sporova stranama u postupku neće se priznavati posebni troškovi, izuzev troškova vještačenja i taksi za vođenje postupka.

(2) U sporovima se pored drugih dokaza može se provesti i dokazivanje vještačenjem putem sudskog vještaka finansijske struke. Troškove vještačenja akontativno, kao avans, plaća strana koja predlaže vještačenje, s tim što će plaćanje troškova, po okončanju postupka, predstavljati obavezu strane koja nije uspjela u sporu.

(3) Ako strana koja predlaže vještačenje akontativno ne uplati troškove vještačenja u ostavljenom roku, postupak će se obustaviti.

(4) U rješavanju sporova pred organima saveza neće se priznavati troškovi advokata niti obračunavati kamate.

Član 26.
(Dokazivanje)

(1) Teret dokazivanja je na podnosiocu zahtjeva ili žalbe, koji je dužan da organu koji vodi postupak dostavi sva relevantna dokazna sredstva.

(2) Za dokazna sredstva prihvaćće se relevantne isprave, svjedoci, vještaci te saslušanje stranaka ili njihove pisane izjave.

(3) Okrivljeni u toku postupka ima pravo zahtijevati da mu se predoče dokazi koji ga terete za povredu odredbi ovog Pravilnika.

(4) Izuzetno, nadležni organ će pravo iz stava (3) ovog člana uskratiti ukoliko je potrebno zaštititi povjerljivost predmeta ili za pravilno vođenje postupka.

Član 27.
(Saslušanje)

(1) Nadležni organ na svojoj sjednici saslušava okrivljenog ili čita njegovo pisano očitovanje po zahtjevu ili žalbi, koje je na zahtjev nadležnog organa okrivljeni dužan dostaviti u roku od sedam dana od dana prijema poziva za dostavljanje očitovanja.

(2) Ukoliko okrivljeni ne dostavi pisano očitovanje po zahtjevu ili žalbi u roku iz stava (1) ovog člana, smatraće se da je saslušan.

Član 28.
(Okončanje postupaka)

(1) Postupak pred nadležnim organom se završava donošenjem odluke.

(2) Postupak pred nadležnim organom će se obustaviti ako se utvrdi da nema dokaza da je povreda Pravilnika počinjena.

(3) Ukoliko prvostepeni organ nije donio odluku po zahtjevu stranke u roku od 30 (trideset) dana po prijemu zahtjeva, nezadovoljna strana može izjaviti žalbu drugostepenom organu u roku od narednih osam dana, računajući od dana kad je trebalo biti odlučeno po podnesenoj žalbi.

Član 29.
(Postupak pred drugostepenim organom)

(1) Drugostepeni organ će odbaciti žalbu kao neblagovremenu, nedopuštenu i nepotpunu ako je to propustio da uradi prvostepeni organ.

(2) Rješavajući o žalbi, drugostepeni organ može odluku prvostepenog organa potvrditi, preinačiti ili ukinuti.

(3) Drugostepeni organ će odbiti žalbu i potvrditi prvostepenu odluku kada utvrdi da ne postoje razlozi zbog kojih se odluka pobija ili da nema drugih razloga zbog kojih se odluka može ukinuti ili preinačiti.

(4) Drugostepeni organ će preinačiti prvostepenu odluku ako utvrdi da je proveden postupak iako su postojali razlozi za njegovo obustavljanje, ako utvrdi da je u prvostepenom postupku činjenično stanje pravilno utvrđeno, ali da se ima donijeti drugačija odluka ili ako nađe da postoje takve povrede pravilnika koje se mogu otkloniti bez ukidanja prvostepene odluke ili da nisu uzete u obzir okolnosti koje su od uticaja na pravilno donošenje odluke ili ako okolnosti, koje se uzete u obzir nisu pravilno ocjenjene, kao i kada nađe da je prvostepeni organ pogrešno ocjenio isprave i dokaze koje nije sam izveo, a odluku je zasnovao na tim dokazima.

(5) Drugostepeni organ će ukinuti prvostepenu odluku i predmet vratiti na ponovni postupak ako utvrdi da postoji povreda postupka koja je bila ili je mogla biti od uticaja na zakonito rješavanje pravne stvari ili ako nađe da zbog pogrešno i nepotpuno utvrđenog činjeničnog stanja treba provesti novi postupak.

(6) Drugostepeni organ će ukinuti prvostepenu odluku kada utvrdi da ju je donio stvarno nenadležni organ i predmet uputiti stvarno nadležnom organu.

(7) Prvostepeni organ kojem je predmet vraćen na ponovni postupak dužan je da izvede sve radnje i raspravi sva pitanja na koja je ukazao drugostepeni organ.

(8) Drugostepeni postupak mora biti okončan u roku od 30 (trideset) dana od dana prijema žalbe, osim kada je usljed opravdanih okolnosti neophodno produžiti prednje navedeni rok, a koji ne može biti duži od dodatnih 30 (trideset) dana.

(9) Za vođenje sporova pred drugostepenim organom moraju se uplatiti takse. Uz zahtjev za rješavanje spora ili žalbu mora se priložiti i dokaz o plaćenju taksi u visini koja je utvrđena odlukom Izvršnog odbora NS/FS BiH ili odlukama entitetskih saveza.

(10) Ako taksa nije plaćena, podnosilac zahtjeva ili žalbe će se pozvati da istu uplati u roku od 48 (četrdesetosam) sati.

(11) Ukoliko u roku propisanom prethodnim stavom ovog člana podnosilac zahtjeva ili žalbe ne uplati taksu, zahtjev ili žalba će se odbaciti.

(12) Odluke drugostepenih organa su konačne i protiv istih žalba nije dopuštena.

(13) Po okončanju postupka i donošenju pravosnažne odluke, a ukoliko odluku nije moguće izvršiti putem Disciplinske komisije Saveza usljed činjenice da nogometni/fudbalski zastupnik nije registrovan kod NS/FS BiH, obavještenje o provedenom postupku i izrečenoj sankciji će biti dostavljen FIFA-i.

IX – DISCIPLINSKA PITANJA

Član 30.

(Nadležnost i izvršenje)

(1) Nadležnost za rješavanje pitanja u vezi sa disciplinskom odgovornošću te izvršenja odluka FIFA-e regulisano je članom 21. FIFA Pravilnika o nogometnim/fudbalskim zastupnicima.

(2) Disciplinska komisija NS/FS BiH nadležna je za izricanje sankcija bilo kojem nogometnom/fudbalskom zastupniku registrovanom u Savezu i klijentu koji je član nogometne/fudbalske organizacije BiH, a koji prekrši odredbe ovog Pravilnika.

(3) Disciplinska komisija NS/FS BiH ima nadležnost u vezi sa:

- a) bilo kojim kažnjivim ponašanjem (koji nema međunarodni karakter), a koje je povezano sa ugovorom o zastupanju ili
- b) bilo kojim kažnjivim ponašanjem u vezi sa domaćim transferom ili domaćom transakcijom.

(4) Ukoliko su klijent ili nogometni/fudbalski zastupnik okrivljeni odlukom nadležnih tijela nogometne/fudbalske organizacije BiH te ukoliko ne postupe u skladu sa pravosnažnim tih tijela, izvršavanje takvih odluka će se vršiti u skladu sa relevantnim odredbama Disciplinskog pravilnika NS/FS BiH, a u slučaju daljeg nepostupanja, mogu se izreći odgovarajuće disciplinske sankcije zbog nepostupanja po odlukama nadležnih organa. U slučaju da nogometni/fudbalski zastupnik ne postupa po prednje navedenim odlukama, Savez će o istom dostaviti obavještenje Generalnom sekretarijatu FIFA-e, za potrebe pokretanja daljih postupaka protiv okrivljenog nogometnog/fudbalskog zastupnika.

(5) Generalni sekretarijat Saveza (nadležne službe) će nadzirati provođenje odredaba ovog Pravilnika, a naročito sljedeće:

- a) Svaka strana koja primi obavijest u kojoj se traže informacije dužna je u potpunosti saradivati postupanjem i usklađivanjem, nakon obrazložene obavijesti, sa zahtjevima za bilo kojim dokumentima, informacijama ili bilo kojim drugim materijalima bilo koje prirode koji posjeduje, kao i zahtjevima za prikupljanje i dostavljanje bilo kakvih dokumenata, informacija ili bilo kojeg drugog materijala bilo koje prirode koji stranka ne posjeduje, ali ga ima pravo dobiti. Neispunjavanje ovih zahtjeva Generalnog sekretarijata Saveza može dovesti do izricanja sankcija od strane Disciplinske komisije NS/FS BiH. Ako to zatraži Generalni sekretarijat Saveza, dokument (ili izvadak) mora se dostaviti na nekom od jezika koji su u službenoj upotrebi u BiH.
- b) Elektroničke obavijesti poslane e-mailom na adresu Saveza ili dostavljene putem TMS-a od strane stranaka smatraju se valjanim sredstvom komunikacije i smatrać će se urednim u pogledu računanja rokova.
- c) Nakon provođenja istrage, Generalni sekretarijat Saveza putem Komiteta za status igrača i transfere NS/FS BiH može proslijediti prijavu slučajeva u kojima je utvrđeno nepoštivanje ovog Pravilnika ili prekršaj pravila etike Disciplinskoj komisiji NS/FS BiH, u skladu sa Disciplinskim pravilnikom NS/FS BiH.

XII – PRELAZNE I ZAVRŠNE ODREDBE

Član 31. (Prelazne odredbe)

(1) Ugovori o zastupanju koji ističu 01.10.2023. godine ili nakon tog datuma, a koji budu na snazi u vrijeme stupanja na snagu ovog Pravilnika, bez obzira na činjenicu da ne ispunjavaju minimalne zahtjeve predviđene ovim Pravilnikom, ostat će na snazi do utvrđenog roka njihovog isteka (ali se ne mogu produžavati).

(2) Svi novi ugovori o zastupanju ili obnovljeni postojeći ugovori o zastupanju zaključeni nakon stupanja na snagu ovog Pravilnika moraju biti usklađeni sa ovim Pravilnikom.

(3) Osoba koja je zaključila bilo kakav ugovor o zastupanju mora imati licencu u skladu sa FIFA Pravilnikom o nogometnim/fudbalskim zastupnicima za nastavak pružanja usluga nogometnog/fudbalskog zastupnika.

Član 32. (Završne odredbe)

(1) Sva sporna pitanja iz ovog Pravilnika će se rješavati po odredbama ovog Pravilnika, u skladu sa Statutom NS/FS BiH i Pravilnicima FIFA-e.

(2) U slučaju neusklađenosti bilo koje odredbe ovog Pravilnika sa odredbama FIFA Pravilnika o nogometnim/fudbalskim zastupnicima, prednost će imati odredbe FIFA Pravilnika o nogometnim/fudbalskim zastupnicima.

(3) Sve što nije regulisano ovim Pravilnikom, rješavat će se prvenstveno u skladu sa odredbama Statuta NS/FS BiH i Pravilnika o registracijama klubova i igrača i statusu i transferima igrača NS/FS BiH, a ukoliko prednje navedeni propisi ne predviđaju rješenje, primjenjivat će se relevantne odredbe Statuta FIFA-e, FIFA Pravilnika o nogometnim/fudbalskim zastupnicima i FIFA RSTP.

(4) Ovaj Pravilnik stupa na snagu i primjenjuje od dana 01.10.2023. godine.

(5) Stupanjem na snagu ovog Pravilnika prestaju da važe odredbe Pravilnika o posrednicima NS/FS BiH, usvojenog na sjednici Izvršnog odbora NS/FS BiH, održanoj 01.07.2017. godine.

**PREDSJEDNIK
Vico Zeljković**